

Կ Ա Ր Գ

Էներգետիկայի բնագավառում ներդրումային ծրագրերի համաձայնեցման

Սույն կարգը սահմանում է Հայաստանի Հանրապետության հանրային ծառայությունները կարգավորող հանձնաժողովի հետ (այսուհետև՝ հանձնաժողով) այն ներդրումային ծրագրերի համաձայնեցման ընթացակարգը, որոնց շրջանակներում իրականացված ներդրումները հետագայում լրիվ կամ մասնակիորեն պետք է ներառվեն լիցենզավորված անձի սակագնում (ծառայությունների մատուցման վճարում):

Սույն կարգի դրույթները չեն տարածվում այն լիցենզավորված անձանց վրա, որոնց սակագները հաշվարկվում են հանձնաժողովի 2007 թվականի մայիսի 4-ի «Հայաստանի Հանրապետության տարածքում վերականգնվող էներգետիկ ռեսուրսների օգտագործմամբ էլեկտրական էներգիա արտադրող կայաններից առաքվող էլեկտրական էներգիայի վաճառքի սակագների հաշվարկման մեթոդիկան հաստատելու և այդ կայաններից առաքվող էլեկտրական էներգիայի 2007 թվականի վաճառքի սակագները սահմանելու մասին» N207Ն որոշման 1-ին կետով հաստատված մեթոդիկայի համաձայն:

1. Ընդհանուր դրույթներ

1. Սույն կարգի իմաստով ներդրումներ են համարվում լիցենզավորված գործունեության իրականացման համար անհրաժեշտ օգտակար և օգտագործվող ակտիվների ավելացմանը կամ փոխարինմանն ուղղված ներդրումները:
2. Լիցենզավորված անձի կողմից հանձնաժողով ներկայացվող ներդրումային ծրագիրը պետք է նպատակաուղղված լինի հետևյալ հիմնախնդիրներից որևէ մեկի կամ մի քանիսի լուծմանը.

- 1) արտադրական հզորությունների ավելացում,

- 2) ծառայությունների մատուցման կամ սպասարկման որակի ցուցանիշների բարելավում,
- 3) տեխնոլոգիական ու առևտրային կորուստների կամ սեփական կարիքների ծախսերի իջեցում,
- 4) մաշված և դուրս գրման ենթակա ակտիվների նորով փոխարինում,
- 5) անվտանգության և հուսալիության մակարդակի բարձրացում,
- 6) շրջակա միջավայրի պահպանությանն ուղղված միջոցառումների իրականացում,
- 7) էներգախնայողության միջոցառումների իրականացում,
- 8) ժամանակակից արդյունավետ տեխնոլոգիաների ներդրում, տեղական պաշարների արդյունավետ օգտագործում,
- 9) հանձնաժողովի և իրավասու այլ մարմինների նորմատիվ իրավական ակտերի պահանջների կատարում,
- 10) լիցենզավորված գործունեության արդյունավետության բարձրացմանն ուղղված այլ անհրաժեշտ միջոցառումների իրականացում:

2. Հանձնաժողովի համաձայնեցմանը ներկայացվող ներդրումային ծրագրերը

3. Լիցենզավորված անձի կողմից հանձնաժողովի համաձայնեցմանը ներկայացվող ներդրումային ծրագրերը պետք է ներառեն.
 - 1) ներդրումային ծրագրի նպատակը և հիմնական ուղղությունները,
 - 2) հիմնական ուղղություններից յուրաքանչյուրով ներդրումներ կատարելու անհրաժեշտության հիմնավորումները,
 - 3) հիմնական ուղղություններից յուրաքանչյուրով ներդրումների ծավալի, իրականացման ժամանակացույցի և սպասվող արդյունքների գնահատականը,
 - 4) ծրագրի ֆինանսավորման աղբյուրները և պայմանները:
4. Հանձնաժողովն իրավասու է լիցենզավորված անձից պահանջել երկրորդ փուլով իր համաձայնեցմանը ներկայացնել ներդրումային ծրագրի առանձին

ուղղությունների նախագծերը կամ դրանց իրականացմանն առնչվող այլ փաստաթղթեր:

5. Լիցենզավորված անձը, ներդրումների իրականացման անհրաժեշտությունը կանխատեսելու և ժամանակի սղության պատճառով դրանք հանձնաժողովի հետ նախապես համաձայնեցնելու անհնարինության դեպքում, կարող է իրականաց-նել անհետաձգելի ներդրումներ: Լիցենզավորված անձը պարտավոր է յուրա-քանչյուր եռամսյակ հանձնաժողով ներկայացնել իրականացված անհետաձգելի ներդրումների մասին տեղեկատվություն՝ մինչև տվյալ եռամսյակին հաջորդող երկրորդ ամսվա 10-ը: Անհետաձգելի ներդրումների մասին տեղեկատվությունը պետք է ներառի դրանց իրականացման անհրաժեշտության հիմնավորումները:

3. Հանձնաժողովի հետ ներդրումային ծրագրերի համաձայնեցման ընթացակարգը

6. Հանձնաժողովը լիցենզավորված անձի ներդրումային ծրագիրը իր մոտ մուտքագրվելու օրվանից սկսում է դրա ուսումնասիրության գործընթացը և.
 - 1) 30 աշխատանքային օրվա ընթացքում համապատասխան գրությամբ լիցենզավորված անձին է ներկայացնում ներդրումային ծրագրի վերաբերյալ իր դիտողություններն ու առաջարկությունները կամ,
 - 2) 60 աշխատանքային օրվա ընթացքում կայացնում է որոշում ներդրումային ծրագրին ամբողջությամբ կամ մասնակիորեն համաձայնություն տալու կամ այն մերժելու վերաբերյալ:
7. Սույն կարգի 6-րդ կետի 1-ին ենթակետով սահմանված դեպքում լիցենզավորված անձը դիտարկում է հանձնաժողովի ներկայացրած դիտողությունները և առաջարկությունները և ծրագրի լրամշակված տարբերակը կրկին ներկայացնում է հանձնաժողովի համաձայնեցմանը: Ներդրումային ծրագրի լրամշակված տարբերակում հանձնաժողովի դիտողություններն ու առաջարկությունները չընդունելու դեպքում լիցենզավորված անձը ներկայացնում է իր պարզաբանումները և հիմնավորումները: Հանձնաժողովը ներդրումային ծրագրի լրամշակված տարբերակն ստանալուց հետո 30 աշխատանքային օրվա

ընթացքում կայացնում է որոշում՝ ներդրումային ծրագրին ամբողջությամբ կամ մասնակիորեն համաձայնություն տալու կամ այն մերժելու վերաբերյալ:

8. Հանձնաժողովի հետ համաձայնեցված ներդրումային ծրագրերում փոփոխություններ կատարելու անհրաժեշտության դեպքում լիցենզավորված անձը դիմում է հանձնաժողով՝ ներկայացնելով ներդրումային ծրագրում փոփոխությունների կատարման անհրաժեշտությունը հիմնավորող համապատասխան փաստաթղթեր: Հանձնաժողովը առաջարկվող փոփոխությունների վերաբերյալ սույն կարգի 6-րդ և 7-րդ կետերում սահմանված ընթացակարգով և ժամկետներում կայացնում է համապատասխան որոշում:
9. Հանձնաժողովի հետ համաձայնեցված ներդրումային ծրագրերի իրականացման ընթացքում ներդրումային ծրագրի ուղղությունների ծավալներից ոչ էական շեղումների դեպքում լիցենզավորված անձը, այդ շեղումները հիմնավորող փաստաթղթերի հետ միասին, դիմում է հանձնաժողով՝ նրա գրավոր եզրակացությունը ստանալու նպատակով: Հանձնաժողովը, 30 աշխատանքային օրվա ընթացքում ուսումնասիրում և տալիս է դրանց վերաբերյալ իր գրավոր եզրակացությունը: Սույն կարգի իմաստով ոչ էական են համարվում այնպիսի շեղումները, որոնց արդյունքում ներդրումային ծրագրի որևէ հիմնական ուղղությամբ հանձնաժողովի հետ համաձայնեցված ներդրումների ծավալի փոփոխությունը չի գերազանցում 3%-ի սահմանը:

4. ԴՐԱՄԱՇՆՈՐՀՆԵՐԻ ԵՎ ՄԻՋԱԶԳԱՅԻՆ ԿԱԶՄԱԿԵՐՊՈՒԹՅՈՒՆՆԵՐԻ ԿՈՂՄԻՑ ՏՐԱՄԱԴՐՎԱԾ ՎԱՐԿԱՅԻՆ ՄԻՋՈՑՆԵՐՈՎ ԻՐԱԿԱՆԱՑՎՈՂ ՆՊԱՏԱԿԱՅԻՆ ՆԵՐԴՐՈՒՄԱՅԻՆ ԾՐԱԳՐԵՐԸ

10. Դրամաշնորհների և միջազգային կազմակերպությունների կողմից Հայաստանի Հանրապետության կառավարության երաշխիքով տրամադրված վարկային միջոցներով իրականացվող նպատակային ներդրումային ծրագրերի համար հանձնաժողովն իրավասու է կիրառել առանձին ընթացակարգեր՝ ելնելով ներկայացված ծրագրի նպատակային առանձնահատկություններից: